

19-ti sastanak Ministarskog savjeta OSCE-a
6-7. decembar 2012. godine, Dublin, Irska

Obraćanje

Nj.E. dr Zlatka Lagumdžije
zamjenika Predsjedavajućeg Savjeta ministara i
ministra inostranih poslova Bosne i Hercegovine

G-dine Predsjedavajući,
Uvaženi šefovi delegacija,
Ekselencije,
Dame i gospodo,

Velika je čast i zadovoljstvo obratiti se u ime Bosne i Hercegovine na 19-om sastanku Ministarskog savjeta Organizacije za evropsku bezbjednost i saradnju.

Dozvolite mi, g-dine Predsjedavajući, da se na početku pridružim mojim kolegama i čestitam Vama i Vladi Irske na izvanrednom predsjedavanju OSCE-om tokom protekle godine. Zaista sam bio impresioniran vašim pragmatičnim i nepristrasnim pristupom, a posebno vašim nastojanjima ka ostvarivanju OSCE-og koncepta zajedničke, sveobuhvatne i nedjeljive bezbjednosti zasnovane na nizu dogovorenih principa i obaveza.

Na početku, također želim da uputim čestitke Mongoliji kao 57-oj državi članici naše Organizacije.

Danas, kao i uvijek, potreban nam je efikasan multilateralizam i vaš rad, kao i rad OSCE-a je od ogromnog značaja u ovoj oblasti, posebno kako se približavamo četrdesetoj godišnjici Helsinške deklaracije 2015. godine.

OSCE je čvrsto radio na stvaranju bezbjednog i prosperitetnijeg svijeta, izgrađenom na zajedničkom razumijevanju i otvorenom dijalogu. Mi u Bosni i Hercegovini možemo sa sigurnošću to garantovati.

OSCE je, u svom sveobuhvatnom konceptu bezbjednosti počevši od Helsinške deklaracije iz 1975. godine za koju se sve do danas opravdano smatra da je načinila pomak u odnosima Istoka i Zapada zajedno sa Bečkim dokumentom iz 2011. i odlukom o prihvatanju Mongolije kao 57-e države članice OSCE, čvrsto napredovao u pružanju pomoći da se stvori ne samo demokratska i mirna Evropa nego da se, kako se to danas često kaže, „promovišu mir i stabilnost od Vankuvera do Vladivostoka“.

Naravno, snovi o miru u čitavom regionu su bili dramatično srušeni tokom krvoprolića i rata koji je zadesio moju zemlju i naše susjede na Balkanu. Čak i tada su države okrenute

ka OSCE radile, prvenstveno na zaustavljanju krvoprolića, a potom i na uništavanju oružja i ponovnoj izgradnji zajednica i sa svojim radom su i dalje nastavile.

OSCE i dalje igra važnu ulogu u Bosni i Hercegovini i želim ovom prilikom da pohvalim Misiju OSCE-a u BiH za dosadašnji rad i aktivnosti sa kojima se nastavlja.

Ljudi posmatraju misiju OSCE-a kao dragulj u kruni OSCE-a i s obzirom da se u Bosni i Hercegovini nalazi jedna od najvećih misija OSCE-a, budite uvjereni da je to zaista tako. Misija OSCE-a u Bosni i Hercegovini ostaje i dalje važan partner u brojnim oblastima – kao što su obrazovanje, izbori, reforme sektora bezbjednosti i jačanje demokratskih institucija - samo da navedem neke.

Kako Bosna i Hercegovina čvrsto nastavlja svoj evro-atlantski put ka punom članstvu u NATO i EU, naš rad sa OSCE-om i podrška OSCE-a pomažu Bosni i Hercegovini u procesu tranzicije od perioda kada je 1990-tih primala međunarodnu bezbjednost do perioda kada danas stvara i pruža međunarodnu bezbjednost.

Regionalna saradnja je jedan od najbitnijih elemenata vanjske politike Bosne i Hercegovine i mi konstantno težimo da pružimo značajan doprinos regionalnoj bezbjednosti i stabilnosti.

Striktno pridržavanje i sprovođenje obaveza iz OSCE-ih instrumenata, uključujući Sporazum o otvorenom nebu i uspješno implementiran Sporazum o subregionalnoj kontroli naoružanja ili regionalni pregled odgovora na OSCE-ov kodeks ponašanja o političko-vojnim aspektima bezbjednosti, su samo neki od načina na koji Bosna i Hercegovina nastavlja da doprinosi regionalnoj stabilnosti i saradnji.

Bosna i Hercegovina i dalje ima obavezu sprovođenja UN Rezolucije 1540 i poduzima aktivnosti koje se tiču razvoja Nacionalnog Akcionog plana Bosne i Hercegovine za implementaciju ove Rezolucije.

Bosna i Hercegovina je svjesna potrebe da više osnaži nedovoljno predstavljene grupe ljudi, kako u političkom tako i u javnom životu.

U pogledu sprovođenja presude koju je 2009. godine donio Evropski sud za ljudska prava u slučaju Sejdić-Finci, postoje različiti stavovi na koji način riješiti ovaj dugotrajni problem diskriminacije ljudi u Bosni i Hercegovini. Međutim, mi smo napravili jedan značajan pomak u rješavanju ovog pitanja i kako se dijalog između političkih stranaka u BiH nastavlja, ja se iskreno nadam da ćemo uskoro riješiti ovo pitanje kako bi svi građani Bosne i Hercegovine ostvarili njihova osnovna ljudska prava.

Kao što je poznato, OSCE-ov sveobuhvatni pristup bezbjednosti, objedinjujući političko-vojne, ekonomske, okolišne kao i ljudske aspekte, obuhvata širok spektar pitanja vezanih za bezbjednost, a koja su bitna za sve nas. S tim u vezi, Bosna i Hercegovina nastavlja sa svojim napretkom u borbi protiv trgovine ljudima, kao i konstantnim naporima u borbi protiv terorizma.

Zaštita i podsticanje ljudskih prava i fundamentalnih sloboda su neophodni za napredak i bezbjednost svih zemalja i Bosna i Hercegovina tu ne predstavlja izuzetak. Smatramo da su demokratske institucije i vladavina prava važne za održavanje mira i stabilnosti kao što su i pitanja koja podrazumijevaju političko-vojnu ili ekonomsku dimenziju OSCE-a.

Bosna i Hercegovina u potpunosti podržava UN Rezoluciju 1325 o pitanjima ravnopravnosti polova i podržava ulogu žena u predstojećim procesima u našoj državi. Krfski proces će nam pomoći da se dalje odredi i redefiniše OSCE i njegova uloga – te da nam uspješno pomogne u izgradnji prosperitetnije, demokratičnije i mirnije Evrope.

Uvjeren sam da će potpuno sprovođenje postojećih obaveza u sve tri dimenzije prema OSCE-u učiniti naš svijet bezbjednijim. Mi svakako moramo biti ujedno i inovativni i konstruktivni. Reformski proces OSCE-a neće biti nimalo jednostavan ali će nam pružiti više povjerenja i novih ideja - kako izvršiti postojeće obaveze i kako se suočiti sa novim izazovima naše bezbjednosti.

U tom pogledu, BiH u potpunosti podržava proces Helsinki+40 i njegove rezultate.

Unaprijed se radujem tom dijalogu, sada i u budućnosti. Pravi dragulj OSCE-a jeste otvoreni dijalog među državama članicama, kao i institucijama i strukturama OSCE-a. Radujem se našem zajedničkom radu u vođenju OSCE-a na naredni nivo, pri tome održavati njegovu svrhu kao istinskog foruma za otvorene i konstruktivne razgovore.

Na kraju, dozvolite mi da pohvalim naše domaćine za odlično organizovanu konferenciju, i kao poslednje, ali ne i zadnje da pozdravim predstojeće predsjedavanje OSCE-om od strane Ukrajine.

Hvala.